

## Catozzo guardia del colpo di Agnello

**Derelitta** - Veni ca a tavula è pronta

**Vito** - (*finendo di allacciardi i pantaloni sotto la panza, si dirige verso i tavolo della cucina attraversando la stanza passa accanto ad Addolorata che telefona*) Chi fa chista sempri attaccata o telefonu ca a natra anticchia ci veni l'aricchia a forma di *cornetta* (*strappa il ricevitore dalle mani della ragazza*) pi cu mi pigghiasti? per Paperon de Paperopoli ah? Cu cu sta parrannu?

**Addolorata** - (*risponde*)

**Vito** - (*alla moglie*) Chi sta dicennu chissa?

**Derelitta** - Dissi chi si sta prenotannu pa trasmissioni di "Fatti vostri"

**Vito** - (*urla*) E tu mi vo diri ca a li setti e menza di lunedì matina ti sta prenotannu pa trasmissioni du venerdì a sira? Ora tu fazzu je u quiz (*alza la mano aperta una chiusa a pugno e solleva un piede*) Avanti scegli na busta chi voi u tumbuluni, u pugno o un cavuciu? Ma talia tu si je aia aviri tri figghi accussi una sta sempri o telefonu..(*si gira verso l'altra che balla*) chista abballa sempri, senti musica e abballa, ma soccu abballi ca trema tuttu u palazzu? pari ca c'è u terremotu. La prima ballerina di la Scala Mercalli si tu. Sempri cu sti cuffi dintra l'aricchi (*Vito toglie le cuffie alla figlia e li indossa*) Fammi sentitiri anticchia a mia chi musica c'è ca ddira (*Strabuzza gli occhi fa il segno della croce come davanti al diavolo, si strappa le cuffie e si rivolge alla moglie*) Ci criu ca chista è scimunita, cu sta musica 'nt'aricchi ca macari ca ci venu un pinseri mancu u senti, e tantu pi ristari in tema di volumi (*indica la terza figlia che legge*) Chi fa chista sempri ddocu a leggiri, ca a forza di leggiri già ha cunsumatu tri para di occhiali, ma chi leggi? (*prende il libro e controlla la copertina e legge sillabando il titolo*) Le Trojadi (*Vito si indigna e ruggisce*) Chista è na casa anurata ca sti cosi vastasi un'hannu a passari mancu di davanti a porta, chi su sti trojadi?

**Immacolata** - (*emette un borbottio, lui si gira verso la moglie*)

**Vito** - Chi dissi?

**Derelitta**- Chi sunnu li figghi di Priamu.

**Vito**- E cu è su Priamu?

**Immacolata** - (*Risponde*)

**Vito** - Chi è ca dissi?

**Derelitta** - Dissi ca era un re

**Vito** - Ah bella erucazioni ca ci resi a li figghi! E iddu 'mmeci d'assittarisi a lu tronu unni s'assittava alla cassa? (*si mette il libro sotto braccio e guarda negli occhi la figlia*) Chistu lu sequestro je e si vo leggeri cocchi cosa d'ora nn'avanti 'nsegnati a leggiri a manu. Moana! (*si mette a tavola*) Eranu tantu beddi li tri scimmietti nun viru, nun sentu e nun parru! A mia 'nveci mi capitaru tri gorilla: vidu vastasati, sentu terremotu e parru sempri o telefonu. E Oronzu chi fa ancora dormi?

**Oronzo** - (*entrando*) No sono sveglio, con tutto il trambusto che fate, come si fa a dormire?

**Vito** - (*si gira verso di lui*) Taliatilu a me figghiu. Chi masculu ! Veni cca o figghiu ca ni facemu na bella colazione comu l'omini!

**Oronzo** - (*si avvicina al tavolo ancheggiando*) C'è uno yogurt?

**Vito** - Ma chi yogurt! Salami, cascavaddu, pipi, stighgiola, cozzi, prummuni, rugnuni, peri i porcu... chistu ci voli a matina p'accuminciari bona a jurnata

**Oronzo** - Ma papà nello yogurt ci sono i fermenti lattici.

**Vito** - Ma chi t'intaressa di frammenti elastici,

**Derelitta** - (*Mette a tavola una pentola con coperchio*)

**Vito** - Talia ccà (*scoperchia la pentola e guarda stupito Derelitta*) Vongole! Chi mi facisti i vongoli pi culazioni? Je mi sduvigghiu a matina presto e prima di iri a travagghiari m'haia mangiari i vongoli? Ma tantu ni sta casa je 'un cuntunenti (*si alza si aggiusta i vestiti e si dirige verso la porta rimane sull'ingresso a guardare moglie e figlie*) nenti cuntunenti na sta casa! Eppuri l'haiu dittu milli voti ca a matina mi piaciunu i cozzi!

**Derelitta** - (*alle figlie*) Je staiu niscennu pi fari a spisa stativi carmi ca staiu turnannu (*esce*)

**Le figlie** - (*appena la madre esce ritornano freneticamente alle loro attività consuete*)

**Vito** - (*Entra furtivo e senza dire una parola va in camera da letto, mentre le figlie continuano a soggetto ognuna nella propria attività*)

**Derelitta** - Picciò chi faciti? u sapiti ca a natra anticchia arriva vostru patri e s'arrabbia siddu v'attrova accusi!

**Le figlie** - (*Rispondono*)

**Derelitta** - Già dintra è? (*guarda l'orologio*) E chi ci fa già dintra a st'ura

**Vito** - (*Esce dalla camera da letto abiti borghesi, cappellaccio calcato, e occhiali naso e baffi da carnevale*)

**Derelitta** - Bedda matri addulurata ma comu ti cumminasti Vitu?

**Vito** - Sshhh donna, il capo mi ha mandato in missione

**Derelitta** - E tu cu sta facci ci vai?

**Vito** - E cu quali, cu chidda to? (*estrae un foglietto e lo sventola davanti a Derelitta disgustato*) Talia ccà la missione importantissima: due etti di prosciutto cotto, un etto di bresciaola...

**Derelitta** - Vitu ma ti mannau a fari a spisa?

**Vito** - Certu e dopu c'ha lavari puru a machina! Pi na missione di chista chi vuliatu ca mi mittia a faccia di Scio Conneru quannu fici Gens Bont? E speriamu cu nn'avissi a sapiri nuddu ma si nno perdu puri a me di facci. (*estrae la patente e comincia a sputarci sopra*)

**Derelitta** - Vitu ma chi fa?

**Vito** - Vistu ca un rinesciu sputarimi na facci sputu ammenu na fotografia da patenti? Je Vito Catozzo la più veloce delle colt addivintavu la più veloce delle colf. Puh!

**Derelitta** - Ma picchi non ci dicisti di no?

**Vito** - Pi centunovantacincu motivi, tri sunnu ccà (*indica le figlie*) l'autri centonovasntadui sunnu li rati di la machina chi ancora ha pagari.

**Derelitta** - A propositu di machini arrivau na littra di la FIAT (*derelitta porge a vito una busta*)

**Vito** - Da FIAT? E chi è n'avvisu di pignoramentu? non po essiri sugnu nnarreri sulu di tri rati, fammi viriri (*mette la patente in mano ala moglie*) Teni cca sputa anticchia tu

**Derelitta** - (*Comincia diligentemente a sputare*)

**Vito** - (*Aprè la busta e legge man mano si trasforma*) Derelitta semu a cavaddu come il calcio sui maccheroni, ma chi fai sputi? (*blocca la moglie*)

**Derelitta** - Ma Vitu mu dicisti tu...!

**Vito** - E ora ti sta dicennu basta, fimmina, Matri mia mi sentu u cori chi caucia, u sangu chi mi ugghi, mi sta vinennu un corpu o popletticu

**Derelitta** - Matri mia Vitu chi hai, chi ti senti mali?

**Vito** - Megghiu d'accussì nun c'ha statu mai a muggieri! T'arricordi quannu ci mannau u curriculum da vita cu i dettagli frattagli e conquagli p'addivintari guardia di colpo di Gianni Agnello?

**Derelitta** - E allura?

**Vito** - *(pausa a effetto)* E allora mi hanno assunto!

**Derelitta** - No!

**Vito** - Si!

**Derelitta** - No!

**Vito** - Si!

**Derelitta** - No!

**Vito** - Senti tu chi vo ca mi pigghiaru o no?

**Derelitta** - Certu

**Vito** - E allura finiscila di diri no e cumincia a diri si! Porco il mondo che c'ho sotto i piedi (*Cammina per la stanza come un leone in gabbia poi di colpo si gira verso le donne*) Sintiti ora sta niscennu, s'arriva u capu facitilu aspittari!

**Derelitta** - E tu unni vai?

**Vito** - Mentri aspettu di mannari a iddu unni ricu je, vaiu je unni mi mannau iddu ... a fari a spisa. *(esce con espressione diabolica)*

**Derelitta** - *(Suona il campanello, va ad aprire)* Buonasera dottor Boranga trasissi, me maritu nisciu pa so cummissioni, a mumentu torna .

**Boranga** - *(Si guarda intorno disgustato)* Speriamo, ca haiu na certa prescia

**Vito** - *(Si apre la porta ed entra insieme con i tre amici)*

**Boranga** - Ah bene Cat.. *(rimane senza parole per l'abbigliamento)*

**Vito** - Ah cca è u dutturi Boranga

**Boranga** - Catozzo, ma comu ti cumminasti? Ma unni ti senti o ciramu?

**Vito** - *(si gira con sufficienza verso gli amici poi con aria di superiorità volge lo sguardo al Boranga, con voce melliflua)* Certu anzi si nun vi dispiaci fazzu trasiri i spettatori ca ora accumincia u film

**Gli amici** - *(Entrano e si mettono seduti attenti come a teatro)*

**Boranga** - Ma chi dici Catozzo, quali film?

**Vito** - *(agli amici)* Quali film Quali film dici iddu...*(cresce l'ira di Vito)* "La rivolta degli schiavi" chistu è u film!

**Boranga** - Catozzo basta un sacco soccu ti succeri ma...

**Vito** - Ah un u capisci soccu succedi? Succede che la qui presente capanna dello zio Tom e Jerri si è rotta le scatole di raccogliere il cotone cantando il blues, a mia u blues tra l'altro mi fa schifu, a mia mi piaci u lisciu (*si gira compiaciuto verso gli amici che approvano*)

**Boranga** - Senti Catozzo i cunti pi stu ciramu ni facemu dopo, ora runami a spisa ca haiu prescia.

**Vito** - Ah la spisa? La spisa vo? E damuccilla sta spisa o caru dutturi! (*tira fuori il contenuto dei sacchetti comincia a lanciarlo addosso a Boranga in particolare un pacco di patatine in testa, un barattolo di nutella spalmato in faccia il tutto commentato a soggetto*) E a cioccolatta senza a panna non po esseri non è veru amici mei?

**Gli amici** - E comu no!

**Vito** - E allura mittemuccilla sta biniditta panna! (*Con una bomboletta di panna sprai guarnisce Boranga finendo con un ciuffo in cima alla testa, fa un passo indietro e ammira la sua opera d'arte*) Ecco fatto è accussi beddu ca veni di fari comu a Michilangilu Boniroti dittu u scarafaggiu: ora ti rugnu na martiddata in testa e poi t'addumannu picchi non parri

**Boranga** - Catozzo ma chi niscisti pazzu?

**Vito** - No sono diventato la nuova guardia di colpo di sua santità Gianni Agnello

**Boranga** - (*Scoppia ridere*) Tu guardia del corpo di Gianni Agnelli? Ma fammi u piaciri!

**Vito** - (*Estrae la lettera e la sventola davanti a Boranga*) Teni ccà leggi tu si un mi cridi

**Boranga** - (*inizia a leggere*) "Gentile Signor Catozzo

**Vito** - U capisti? Gentile Signor Catozzo non comu tia "Catozzu ri cca Catozzu ri dda, va fammi a spisa, lavami a machina, portami a spassu u cani... ma je ti lu 'nchiaccu ravanti l'uocchi ssa manata di puci, emu avanti!

**Boranga**- (*continua*) "Abbiamo preso atto con molto piacere, della sua domanda di assunzione ma visto il suo curriculum la vorremmo pregare di volerci esonerare della sua presenza

**Vito** - I capisti a chissi non sulu onorare ma addirittura ESONORARE della sua presenza e je a stari cca a farimi trattari comu na pezza da un pezzu di fangu comu a tia. Ta pozzu diri na cosa cu tuttu u cori? Ma va jeccati 'nta un puzzu e fatti mangiari de cani.

**Gli amici** - (*applaudono e gridano festanti*)

**Boranga** - Catozzo... Forse non nu capisti bonu ESONERARE non esonorare ed "esonerare della sua presenza" vuole dire "fare a meno", mancu fariti vidiri, aria, smamma, scioh

**Vito** - (*distrutto e atterrito*) allura vol diri chi scanciai luccioli ppi lambretti, vol diri ca travagghiu non mi ni runanu

**Boranga** - ... esattamente

**Vito** - (*dopo un breve istante di pausa guarda la moglie e le figlie, si getta ai piedi di Boranga e gli bacia le mani*) Capo, Eccellenza, Sua santità nun mi cunsumari è stato un tragico equinozio Pinsassi ca haiu na famighia 'ncapu i spaddi, ha vistu quantu pisanu chisti: quattu fimmini setti quintali. Non mi licenziassi pi carità, cil lavu la machina, ci portu a spassu ddu beddu cagnuleddu cu ddu beddu pilu e di puci accussi duci, ci duggnu arrè di lei anzi ci ricu di vossia, anzi u pozzu chiamari eccellenza?

**Boranga** - (*Aiuta Vito a rialzarsi*) Sta tranquillu Catozzo ca non ti licenziu e sai picchi

**Vito** - Picchi lei è bonu è un patri, è un pezzu di pani

**Boranga** - No, picchi ti vogghiu viriri soffriri jornu pi ghiornu, minutu pi minutu, lentamenti, scientificamenti ...benvenuto all'inferno, uomo! (*con una risata beffarda esce, e continua a ridere a lungo*)

**Vito** - (*Cerca di recuperare la faccia...*) Ma si, vattinni. chi mi ni frega di tia e di chiddi comu a t...

**Boranga** - *(si riapre la porta di scatto e rientra)* Dicisti quarche cosa?

**Vito** - Nenti di nenti, mutu comu un pisci aiu statu!

**Boranga** - Benissimo t'aspettu dumani matina a li setti

**Vito** - *(Scatta sull'attenti e batte i tacchi)* Posso veniri e sei di matina?

**Boranga** - *(Senza rispondere chiude la porta)*

**Gli amici** - *(lentamente senza dire una parola se ne vanno)*

**Derelitta e le ragazze** - *(Spariscono con le facce serie e in fila indiana)*

**Vito** - Ma si itivinni tutti, chi mi 'ntaressa di vuatri! ma iti a fari tutti 'nsacchetta, iu ma passu benissimu macari sulu, nun haiu bisognu di nuddu, u sapiti chi fazzu , scrivu a Berlusconi, eccu chi fazzu! Ci scrivu o Cavaleri e mi nni vaiu intra a televisioni ! ... 'Ntantu però mi va curcu ca dumani m'haia susiri prestu, *(mentre si allontana)* c'haia puttari u cani a spassu,c'haia lavari amachina, c'haia fari a spisa, c'haia puliziaru a casa... e chi vi pari ca sugnu sfacinnatu je.